

傷寒紀玄妙用集

二

傷寒紀玄妙用集卷第三

禦天醫藥部都憲民司提點尚書編次

論惡寒惡風背惡寒脉證并治第一

三者均為在表然亦有虛實之分惡寒為風寒
客於營衛之中則灑淅然而寒也惟其營衛之
受風寒則嗇嗇然不欲舒也其惡寒則不待風
而寒雖身有大熱而不欲去衣者是也黃帝鍼
經曰衛氣者所以溫分肉而充皮膚膏肥腠理而

司開闔者也風邪中於衛則必惡風何以言之
風則傷衛寒則傷營為風邪所中於分肉不溫
而熱矣皮毛不充而緩矣腠理失其肥則疎而
不密矣開闔失其司則洩而不固矣經曰發熱
而惡寒者發於陽也可發汗宜麻黃湯無熱而
惡寒者發於陰也當溫之宜理中湯此二證有
陰陽之別無熱惡風悉屬於陽陰證並無惡風
之例無汗而惡寒者則為傷寒當發其汗麻黃

湯主之汗出而惡寒者則為中風當解其肌桂
枝湯主之又有止稱背惡寒者背為胸之府諸
陽受氣於胸中而轉行於背背為陽腹為陰陽
氣不足陰寒氣盛則背為之惡寒亦有二證焉
少陰病一二日口中和而背惡寒者當灸之處
以附子湯者是矣此為陰寒氣盛者也若陰氣
不足陽氣內入陰中乘表陽新虛而背惡寒此
為陽氣內陷經曰傷寒無大熱口渴渴心煩背

惡寒者白帶加人參湯主之是也二者均是背
惡寒要辯陰陽寒熱之不同亦於口中潤燥可
知矣

太陽中風脈浮緊發熱惡寒身疼痛不汗出而
煩躁者大青龍湯主之若脈微弱汗出惡風者
不可服服之則厥逆筋惕肉瞤此為逆也以真
武湯救之

發汗病不解及惡寒者虛故也芍藥甘草附子

湯主之○少陰病得之一二日口中和其背惡
寒者當灸之附子湯主之○少陰病身體痛手
足寒骨節痛脉沉者附子湯主之

論發熱潮熱寒熱脉證并治第二

發熱者謂怫怫然發於皮膚之間熛熛然散而
成熟者是也有謂翕翕發熱者有謂蒸蒸發熱
者此輕重表裏之不同翕翕發熱者謂若合羽
所覆明其熱在外也與桂枝湯以散之蒸蒸發

熱者謂熏蒸之蒸明其熱在內也與調胃承氣
湯下之潮熱者如潮水之潮其來不失其時一
日一發指時而發者謂之潮熱潮熱屬陽明必
於日晡所發胃屬土應時而旺於四時應日而
王於申未潮熱屬胃者明矣此外邪已除裏實
可攻者也又有寒熱者邪正分爭往來寒熱是
也蓋正氣不為之爭但熱而無寒爭則氣鬱不
發於外而寒熱生焉是以往來寒熱屬半表半

裏之證小柴胡湯主之病至十餘日而熱結在
裏復往來寒熱者可與大柴胡湯下之其餘發
熱惡寒熱多寒少脈微弱者此無陽也不可發
汗亦不可下宜桂枝二越婢一湯主之
太陽病過經十餘日反二三下之後四五日柴
胡證仍在者先與小柴胡湯嘔不止心下急鬱
鬱微煩者為未解也與大柴胡湯下之則瘳○
傷寒十三日不解胃脘滿而嘔日晡所小有潮

熱已而微利此本以柴胡下之以不得利今反
利者知醫以圓藥下之非其治也潮熱者實也
先宜小茈胡湯以解外後以柴胡加芒硝湯主
之○傷寒五六日已發汗而復下之胸脅滿微
結小便不利渴而不嘔但頭汗出往來寒熱者
心煩者此為未解也茈胡桂枝乾薑湯主之○
傷寒六七日發熱微惡寒肢節煩疼微嘔心下
支結外證未去者柴胡加桂枝湯主之

論自汗無汗頭汗手足汗衄證并治第三
自汗謂不因發散而自然汗出者是也經曰陽
氣衛外而為固也衛為陽言其衛護皮膚肥實
腠理禁固津液不得妄洩汗者干也邪氣干於
衛氣不能衛固於外則皮膚為之緩腠理為之
疎繇是津液外泄澌澌狀潤漉漉然出謂之自
汗也然自汗有九證衛不和之自汗風邪干於
衛也宜桂枝湯傷風自汗汗出惡風宜桂枝湯

風溼自汗身重多眠鼻息必鼾語言難脈陰陽
俱浮宜姜桂湯中濕自汗然當喜汗不可止之
中暑自汗白帛湯陽明經自汗不可利小便以
汗多津液外出胃中乾燥故大便必鞭譫語者
調胃承氣湯亡陽自汗太陽證發汗過多遂漏
不止其人惡風當溫其經宜桂枝加附子湯柔
痊自汗太陽病發熱脈沉細歔頭搖卒口噤背
反張汗出不惡寒者小續命湯霍亂自汗吐利

汗出發熱惡寒四肢拘急手足厥冷者四逆湯
此皆自汗者也寒邪中經腠理緻密津液內滲
則無汗或水飲內蓄與夫亡陽以虛皆令無汗
太陽病惡風無汗而喘及絛浮緊無汗發熱及
不汗出而煩躁陽明病反無汗而小便利二三
日嘔而欬手足厥苦頭痛鼻乾不得汗脉浮無
汗而喘與夫劉瘕無汗此數者皆寒邪在表而
無汗者也又陽明病無汗小便不利心中懊憹

身必發黃及傷寒發熱無汗渴欲飲水者白朮
加人參湯三陰無病不得有汗此數者皆邪行
於裏而無汗者也又陽虛則津液衰少故無汗
經所謂脈浮而遲遲為無陽不能作汗其身必
癢陽明病及無汗其身如蟲行皮中之狀此數
者皆陽虛無汗者也無汗有七證惟太陽可發
汗宜麻黃湯其餘諸經則不得有汗頭者諸陽
之會邪傳諸陽津液上湊則汗見於頭其證有

五傷寒五六日已汗下胸脅滿微結小便不利
渴而不嘔但頭汗出往來寒熱心煩者此表未
解也宜柴胡桂枝乾薑湯病人但頭汗出身無
汗漉頸而還小便不利渴飲水漿此皆瘀熱在
裏身必發黃宜五苓散茵陳蒿湯陽明病下之
其外有熱手足溫不結胸心中懊懷饑不能食
但頭汗出宜梔子豉湯心下堅滿無大熱頭汗
出此為水結在胸宜小半夏加茯苓湯陽明病

下血譫語此為熱入血室但頭汗出者當刺期
門隨其實而瀉之熾然汗出而瘃矣此數者皆
汗出於頭者也四肢為諸陽之本而胃主四肢
凡手足汗皆屬陽明陽明為津液之主熱聚於
胃津液旁達所以汗及手足也經曰手足熾然
汗出者此大便必鞭也大承氣湯主之三陽併
病手足漉漉汗出大便難而譫語者下之則瘃
大承氣湯主之繇是論之手足汗出為熱聚於

胃明矣

太陽病發汗遂漏不止其人惡風小便難四肢微急難以屈伸桂枝加附子湯主之

論頭痛項強脉證并治第四

傷寒頭痛謂邪氣外在經絡上攻於頭所致難經曰三陽受風寒伏留而不去者名厥頭痛三陽雖俱頭痛非若太陽專主也以其經起於目內眥上額交巔入絡腦還出別下項挾脊抵胛

中所以太陽受病則頭項痛腰脊強也太陽病
頭痛發熱汗出惡風者桂枝湯主之傷寒六七
日不大便頭痛有熱者調胃承氣湯主之太陰
少陰二經之脈皆上至頸胸中而還則無頭痛
之證惟厥陰之脈連目系上出額與督脈會於
巔故亦有之經曰乾嘔吐涎沫頭痛者吳茱萸
湯主之項強則太陽咸受風寒經脈不利而項
為之強頸為之急也凡頸項強急皆是太陽表